

В ПОНЕДЕЛЬНИК ВТОРЫЯ СЕДМИЦЫ ПО ПАСЦЕ ВЕЧЕРА

На Господи воззвах: поставим стихов 6, и поем подобны, глас 4-й:

Подобен: Яко добля:

Воскрес из гроба, заключенным дверем, предстал еси другом Твоим всесильне, и Фоме неверовавшу, гвоздей показал еси язвы, и ребра еже от копия прободение, утверждая и уверяя того Слове, яко Ты Сам еси, за милосердие претерпевый спасительныя страсти.

За многое снисхождение, и милосердие безмерное, мое зря истощание не усумнися, но уверися Близнче, Господь рече: яко Сам есмь Аз пострадавый, и тридневен из гроба воскресый, и адова сокровища истощивый, и ожививый от века умершия.

Удивився яко узре Фома возопи, егда виде Тя всесильне: Ты еси Бог мой и Господь, верую Человеколюбче, яко Сам еси пострадавый, и страсти исцеляяй душ наших. Кланяюся Твоей державе, и миру возвещаю страшное Твое и всесильное востание.

И Миней 3. Слава, и ныне: глас 1-й:

Учеником сомнящимся, во осмый день предста Спас, идеже бяху собрани, и мир дав, Фоме возопи: прииди апостолу, осяжи длани, в нихже гвоздиз вонзоша. О доброе неверие Фомино, верных сердца в познание приведе, и со страхом возопи: Господь мой и Бог мой, слава Тебе!

Свете тихий:

На стиховне стихиры, глас 1-й:

Обыдите людие Сион, и обымите его, и дадите славу в нем Воскресшему из мертвых: яко Той есть Бог наш, избавлей нас от беззаконий наших.

Стих: К Тебе воздвигох очи мои:

Яко помышлению лукавыми, и дела осудихся Спасе, мысль мне даруй обращения Боже, да зову: спаси мя благодетелю Благий, и помилуй мя.

Стих: Помилуй нас Господи, помилуй нас:

Мученичен: Еже на судищи ваше исповедание святии, демонов оплева силу, и от прелести человеки свободи. Темже и главам усекаемым, взывасте: да будет, Господи, жертва душ наших благоприятна пред Тобою, яко Тебе возлюбивше нерадихом о временной жизни, Человеколюбче.

Слава, и ныне: глас 2-й:

По востании Твоем Господи, собранным учеником Твоим, и дверем заключенным, посреде стал еси, мир подая им: веровав же и Фома, зрением руку и ребр Твоих, Господа и Бога Тя исповеда, спасающего уповающия на Тя, Человеколюбче.

Ныне отпущаеши:

По Трисвятом, тропарь праздника. Аще ли тропарь святого, рцы его прежде.
Потом:

Слава, и ныне: Тропарь праздника, глас 7-й

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

И отпуст.

ВО ВТОРНИК ВТОРЫЯ СЕДМИЦЫ, НА УТРЕНИ,

На Бог Господь, тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. **[Трижды].**

По 1-м стихословии, седален, глас 1-й:

Подобен: Камени запечатану:

Жены ко гробу приидоша урания, и ангельское явление видевшия трепетаху: гроб облиста жизнь, чудо удивляше я. Сего ради шедшия, учеником проповедаху востание: ад плени Христос, яко един крепок и силен, и истлевшия вся совоздвиже, осуждения страх разрушив Крестом.

Стих: Господи да не яростию Твоею обличиши мене, ниже гневом Твоим накажеша мене.

Аще праведник едва спасается, аз грешный где явлюся, тяготы и вара дневнаго не понесший? Но с наемники единонадесятаго часа причти мя Боже, и спаси мя.

Стих: Дивен Бог во святых Своих, Бог Израилев.

Мученичен: Яко добрии воины единомудренно веровавше, прещения мучителей не убоявшеся святии, приидосте усердно ко Христу, взявше честный крест, и скончавше течение, с небесе победу приясте. Слава укрепльшему вы: слава венчавшему вы: слава действующему вами всем исцеления.

Слава, и ныне: Богородичен:

Нерушимую стену имуще вернии Богородицу Марию, приидите поклонимся, и припадем Ей: дерзновение бо имать к Рождшемуся из Нея, и молити, и спасати от гнева и смерти души наша.

По 2-м стихословии седален, глас 5-й:

Подобен: Собезначальное Слово:

Апостола вси и ученика Христова восхвалим песньми в память его: боголепно бо наша помышления, той язвы гвоздей осязав, известну веру изыскав, утверди в мире, и молит Спаса, помиловатися душам нашим.

Слава и ныне: тойже.

Таже, Воскресение Христово: псалом 50. Канон праздника со ирмосы на 8: и Миней на 4. По 3-й песни, седален Миней. Кондак и експостиларий праздника.

Песнь 1.

Ирмос: Поим вси людие, от горкия работы фараони Израиля Изменшему, и во глубине морстей ногами немокрыми Наставльшему, песнь победную: яко прославися.

Днесь весна душам, зане Христос от гроба якоже солнце возсияв тридневный, мрачную бурю отгна греха нашего. Того воспоим, яко прославися.

Царица дней, светоносному дню, дней же царю явственнейши дароносе, красит избранныя люди церковныя, непрестанно поя воскресшаго Христа.

Врата смерти Христе, ниже гробныя печати, ниже ключи дверей Тебе противишася: но воскрес предстал еси другом Твоим Владыко, мир даруяй, всяк ум преимущ.

И святого Минея на 4.

Катавасия: Воскресения день, * просветимся, людие: * Пасха, Господня Пасха! * От смерти бо к жизни * и от земли к небеси * Христос Бог нас преведе, * победную поющия.

Песнь 3.

Ирмос: Утверди мене Христе, на недвижимом камени заповедей Твоих, и просвети мя светом лица Твоего: несть бо свят паче Тебе Человеколюбче.

Новыя вместо ветхих, вместо же тленных нетленная, Крестом Твоим Христе совершив нас, во обновлении жизни жительствовати достойно повелел еси.

Во гробе заключен описанною плотию Твоею, неописанный Христе воскрес еси: дверем же заключенным, предстал еси Твоим учеником Всесильне.

Язвы Твоя Христе, яже волею претерпел еси за нас, учеником Твоим сохранив, свидетельство показал еси Твоего славнаго Воскресения.

И святого Минея на 4.

Катавасия: Приидите, пиво прием новое, * не от камене неплодна чудодеемое, * но нетления источник, * из гроба одождивша Христа, * в Немже утверждаемся.

И кондак, и седален святого.

Слава, и ныне: седален празднику, глас 6-й:

Яко посреде учеников Твоих пришел еси Спасе, мир дая им: прииди и к нам и спаси нас.

Песнь 4.

Ирмос: Велия тайна Твоего Христе, смотрения: сию бо свыше провидя, богозрительно Аввакум, изшел еси, вопияше Тебе, во спасение людей Твоих Человеколюбче.

Желчи убо вкуси, древнее вкушение исцеляя, ныне же с сотом меда, просвещение подая Христос праотцу, и Свое сладкое Причастие.

Радуетися испытаетъ: темже Человеколюбче, на сие повелеваеши Фоме, простирая неверующему ребра, мірови уверяя Твое Христе, тридневное Востание.

Богатство почерп от сокровища некрадомаго Божественнаго, Благодетелю, копием прободеннаго Твоего ребра, премудрости и разума наполняет мір близнец.

Твой всеблаженный хвалится язык, о близнче! Первый бо благочестно проповедует Жизнодавца Иисуса, Бога же и Господа, от осязания исполнься благодати.

И святаго Минея на 4.

Катавасия: На Божественной стражи * богоглаголивый Аввакум * да станет с нами и покажет * светносна Ангела, * ясно глаголюща: * днесь спасение миру, * яко воскрес Христос, * яко Всесилен.

Песнь 5.

Ирмос: От нощи утреннюю поем Тя, Христе, Отцу Собезначальна, и Спаса душ наших: мир мірови подаждь, Человеколюбче.

Представ другом скорбящим Спас, пришествием всю отъемлет скорбь, и играти воздвизает Своим Воскресением.

О воистинну похваляемаго Фомы страшнаго начинания! Дерзостно бо осяза ребра, Божественным огнем блистающая.

Неверие Фомино, веры родительное нам показал еси: Ты бо вся премудрости Твоею промышляеши полезно Христе, яко Человеколюбец.

И святаго Минея на 4.

Катавасия: Утренюем утреннюю глубоку * и вместо мира песнь принесем Владыце, * и Христа узрим правды Солнце, * всем жизнь возсияющая.

Песнь 6.

Ирмос: Пророка спасл еси от кита Человеколюбче, и мене из глубины предгрешений возведи, молюся.

Фомы не оставил еси Владыко, погружаема глубинное неверия, длани простер на испытание.

Спас наш глаголаше: осязавше мя видите кости и плоть носяща, Аз не пременихся.

Ребра осяза, и веровав позна Фома, не сый в первом входе Твоем, Спасе наш.

И святаго Минея на 4.

Катавасия: Снизшел еси в преисподняя земли * и сокрушил еси верей вечныя, * содержащия связанных, Христе, * и тридневен, яко от кита Иона, * воскресл еси от гроба.

Кондак, глас 8-й:

Любопытною десницею, жизнеподательная Твоя ребра Фома испыта Христе Боже: созаклоченным бо дверем яко вшел еси, с прочими апостолы вопияше Тебе: Господь еси и Бог мой.

Икос: Кто сохрани ученичу длань тогда неопалиму, егда ко огненным ребром приступи Господним? Кто даде ей дерзость, и возможе осязати пламенную кость, всяко неосязимую? Аще бо не бы ребро силу подало брenneй деснице, како можаше осязати, страданьми поколебавшая яже выше, и яже низу? Сия благодать Фоме дадеся, еже сия осязати, Христови же вопити: Господь еси и Бог мой.

Песнь 7.

Ирмос: Образу служити мусикийскому согласию созывающу люди, от песней Сионских поюще отчески отроцы Давидовы, мучителево разориша злочестивое веление, и пламень в росу преложиша, песнь воспевающе: превозносимый отцев и наш Боже, благословен еси.

Яко первый есть дней и Господьственный светоносный сий, воньже радоватися достойно новым и божественным людем с трепетом: приносит бо и века образ, яко осмица совершая будущаго, превозносимый отцев и наш Боже, благословен еси.

Един дерзнувый, неверною же верою облагодетельствовавый нас Фома близнец, решит убо мрачное неведение всех концов, верным неверствием, себе же венец плетет яве глаголя: Ты еси Господь, превозносимый отцев и наш Боже, благословен еси.

Не все усумневся Фома о востании Твоем, не низложися: но несумнительное тщапешя показати сие Христе, всем языком. Отонудуже неверием уверив, всех научи глаголати: Ты еси Господь превозносимый отцев и наш Боже, благословен еси.

Со страхом руку Фома в ребра Твоя живоносная, Христе, вложив, трепетен ощути действо, Спасе, сугубое, двема естествома в Тебе соединяемыми неслиянно, и верою взываше глаголя: Ты еси Господь превозносимый отцев и наш Боже, благословен еси.

И святаго Минея на 4.

Катавасия: Отроки от печи избавивый, * быв Человек, * страждет яко смертен, * и страстию смертное * в нетления облачит благолепие, * Един благословен * отцев Бог и препрославлен.

Песнь 8.

Ирмос: В пламени огненне горящая пещи Сохраншаго дети, и во зраце ангела Снизшедшаго к ним, пойте Господа, и превозносите Его во веки.

Возжелевый Твое радостное видение, прежде не вероваше Фома: сподоблься же того, Бога и Господа Тя нарицаше Владыко, Егоже превозносим во вся веки.

Претерпевшаго Фомино неверие, и показавшаго ребра, и того дланию осызана бывша, пойте Господа, и превозносите Его во веки.

Твое неудобное сокровище, утаенное нам отверзе Фома: богословив бо языком богоносным, пойте Господа, глаголаше, и превозносите Его во вся веки.

И святого Минея на 4.

Катавасия: Сей нареченный и святой день, * Един суббот Царь и Господь, * праздников праздник * и торжество есть торжеств: * воньже благословим Христа во веки.

И стихословим Честнейшую

Песнь 9.

Ирмос: Тебе светлую свещу, и Матерь Божию, пречудную Славу и высшую всех тварей, песнями величаем.

Твой светлый день и пресветлый Христе, всесветлую благодать, воньже красный добротой учеником Твоим предстал еси, в песнях величаем.

Тебе брэнною дланию осязаема в ребра, и не опаливши сию, огнем невестественнаго Божественнаго существа, в песнях величаем.

Тя яко Бога из гроба воскресша Христа, не очима видевши, но сердечною любовию веровавши, песнями величаем.

И святого Минея на 4.

Катавасия: Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Екзапостилларий, глас 3-й:

Подобен: Небо звездами:

Моих удов рукою твоею испытавый язвы, не неверуй Ми Фома, узвленному тебе ради, со ученики единомудрствуй, и живущаго проведуй Бога. [Дважды]

Слава: святого, аще есть и ныне:

Днесь весна благоухает, и новая творь ликует. Днесь взимаются ключи дверей, и неверия Фомы друта вопиюща: Господь и Бог мой.

На хвалитех, стихиры на 4, глас 1-й:

Крест претерпевый, и смерть упразднивый, и воскресый из мертвых, умири нашу жизнь Господи, яко един всесильен. [Дважды.]

Не пренебрежи мене Спасе мой, ленистия греховною содержи: воздвигни мое помышление к покаянию, и Твоего винограда делателя искусна покажи мя, даруя ми едионадесятаго часа мзду, и велию милость.

Мученичен: Сии воины Царя великаго, сопротивившася повелением мучителей доблественно, небрегоша о муках, и прелесть всю поправше, достойно венчани бывше, просят у Спаса мира, и велия милости.

Слава, и ныне: глас 2-й:

Дверем заключенным, представ Спас учеником, безстрашие и мир даяше. Таже глаголет Фоме: что Мне не веруеши, яко воскресох из мертвых? Принеси семо руку твою, и вложи в ребра Моя, и виждь. Тебе бо неверующу, вси навикоша страсти и Воскресение Мое звати с тобою: Господь мой и Бог мой, слава Тебе.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры праздника, глас 2-й:

Подобен: Доме Евфрафов:

Воспоим вернии, * непрестанно со ангелы, * Христа воскресшаго, * тридневна из гроба, * и мир совоздвигшаго.

Стих: Во всю землю изыде вещание их, * и в концы вселенныя глаголы их.

Фома Твоя ребра, * Благоутробне, осязав, * к вере възде: * и мы тем Тя * Бога прочее познахом.

Стих: Небеса поведают славу Божию, * творение же руку Его возвещает твердь.

Подаеши о Избавителю, * мир людям Твоим * воскрес из гроба, * и мир совоздвигнувый от ада, * Всесильне.

Слава, и ныне: глас 6-й: Иоанна монаха:

Дверем заключенным, пришел еси Христе ко учеником, тогда Фома смотрительно не обретеса с ними. Глаголаше бо: не иму веры, аще не увижду и аз Владыки. Увижду ребро, отонудуже изыде кровь, вода, крещение: увижду язву, от неяже исцеле великий струп человеческий: увижду, како не бе якоже дух, но плоть и кости. Смерть поправый, и Фому уверивый, Господи слава Тебе.

Таже, Благо есть исповедатися Господеви

Трисвятое. И по Отче наш:

Тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

Таже ектения: Помилуй нас Боже:

Час 1. И отпуст.

НА ЛИТУРГИИ

Блаженна от канона праздника, песнь 4-я.

Желчи убо вкуси, древнее вкушение исцеляя, ныне же с сотом меда, просвещение подая Христос праотцу, и Свое сладкое Причастие. [Дважды]

Радуетися испытаетъ: темже Человеколюбче, на сие повелеваеши Фоме, простирая неверующему ребра, мірови уверяя Твое Христе, тридневное Востание. [Дважды]

Богатство почерп от сокровища некрадомаго Божественнаго, Благодетелю, копием прободеннаго Твоего ребра, премудрости и разума наполняет мір близнец.

Твой всеблаженный хвалится язык, о близнче! Первый бо благочестно проповедует Жизнодавца Иисуса, Бога же и Господа, от осязания исполнься благодати.

По входе тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. [трижды].

И храма Богородицы, и храма святого. Посем настоящего святого, аще есть. Таже кондак храма святого. Слава: святого:

И ныне: праздника: Кондак, глас 8-й:

Любопытною десницею, жизноподательная Твоя ребра Фома испыта Христе Боже: созаклученным бо дверем яко вшел еси, с прочими апостолы вопияше Тебе: Господь еси и Бог мой.

Храма же Христова, и Богородицы кондак, во всю Пятдесятницу не глаголем.

Прокимен Апостола, глас 3-й: Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 10-е. [Деян. 4, 1 – 10.]

Глаголющим апостолом к людям, наидоша на них священники и воевода церковный и саддукее, Жаляще си, за еже учить им люди и возвещати о Иисусе воскресение мертвых: И возложиша на них руки и положиша их в соблюдение до утрия: бе бо вечер уже. Мнози же от слышавших слово вероваша: и бысть число мужей яко тысящ пять. Бысть же наутрие собратися князем их и старцем и книжником во Иерусалим, И Анне архиерею и Каиафе и Иоанну и Александру, и елицы беша от рода архиерейска: И поставльше их посреде,

вопрошаху: коею силою или коим именем сотвористе сие вы? Тогда Петр, исполнився Духа Свята, рече к ним: князи людстии и старцы Израилевы, Аще мы днесь истязуеми есмы о благодеянии человека немощна, о чесом сей спасеся, Разумно буди всем вам и всем людем Израилевым, яко во имя Иисуса Христа Назореа, Егоже вы распясте, Егоже Бог воскреси от мертвых, о Сем сей стоит пред вами здрав.

Аллилуиа, глас 8-й: Приидите возрадуемся Господеви, воскликнем Богу Спасителю нашему.

Стих: Яко Бог велий Господь, и Царь велий по всей земли.

Евангелие Иоанна, зачало 10-е. [Ин. 3, 16 – 21.]

Тако возлюбил Бог мир, яко и Сына Своего Единороднаго дал есть, да всяк веруяй в Онъ не погибнет, но имать живот вечный. Не посла бо Бог Сына Своего в мир, да судит мирови, но да спасется Им мир. Веруяй в Онъ не будет {несть} осужден: а не веруяй уже осужден есть, яко не верова во имя Единороднаго Сына Божия. Сей же есть суд, яко свет прииде в мир, и возлюбилша человецы паче тму, неже свет: беша бо их дела зла. Всяк бо делаяй злая ненавидит света и не приходит к свету, да не обличатся дела его, яко лукава суть: Творяй же истину грядет к свету, да явятся дела его, яко о Бозе суть соделана.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Похвали Иерусалиме Господа, хвали Бога Твоего Сионе.

Аллилуиа, [трижды]